

校經室文集



校經室文集補遺目錄

國朝漢學師承記序

周易象解序

古文周易跋

卜氏族譜後序

張氏新譜後序

楹書隅錄後序

魯巖所學集後序

周文忠公制義後序

翟氏家集序

重脩南陽節義祠記

恭跋月令七十二候詩畫冊

代澄甫貝勒作

題徐氏闡幽錄

重修仲子祠堂記

代李子和河帥作

上李□□觀察書

上孫琴西方伯書

答李仲彭部郎書

乙未仲春寄李鑑堂中丞書

寄李鑑堂中丞書

與李鑑堂制軍書

覆許士衡孝廉札

覆許士衡孝廉札

覆許士衡孝廉札

丁稚璜宮保六十壽序

代文式甫中丞作

尹菊田太守八十有二壽序

代匡鶴泉侍郎作

寶玉峰先生六十壽序

陳雋丞中丞七十壽序

張母某太孺人七十壽序

誥封太恭人于姻伯母劉太恭人七十壽序

黃母楊孺人家傳

勅封修職郎固始縣訓導曹君墓碣

四書養正序

胡氏續修宗譜序

雪樵詩存後序

怡養齋續集序

堇廬遺詩序

樨香山房詩鈔後序

昌黎落霞琴搨本跋

吳君仲霖暨德配魯恭人六旬晉一雙壽序

前浙江候補道李穀宜封翁六旬暨德配汪夫人

雙壽序

誥授奉政大夫郭湘帆先生暨德配陳宜人七十
雙壽序

嚴望皋先生夫婦七十雙壽序

蕭母何太恭人九十壽序

誥授榮祿大夫二品銜前湖北漢黃德道武公墓
表

書錢大昕重刻孫明復小集序後

孫明復小集跋

書侯官謝退谷先生教諭語後

論策合鈔簡編序

望溪文集補遺跋

誥封朝議大夫許君墓誌銘

校經室文集補遺

榮城孫葆田著

吳興劉承幹校

國朝經師漢學師承記序

余旣敘錄漢人經義又爲之說曰 國朝言易自惠氏
言書自王氏江氏言詩自戴氏言禮自張氏江氏言春
秋左氏傳自惠氏學雖不同要皆以漢人爲宗發明古
義玩經文而得其大體余故取之嗟乎自利祿之途開
而士皆弊於俗學無復爲實事求是之義昔人所謂漢
儒訓義優洽獨得聖賢遺意者世皆棄之如遺元明之

世益尤甚焉天眷 聖清經學昌明乾嘉閒經師繼起
明象數考制度審聲音發訓詁之學相承不絕於是儀
徵阮文達公總集爲 皇清經解彬彬乎備漢京之鉅
觀已然惑者旣失精微而一二承學之士鄉風隨流罔
識體要分文析字一義之殊攷究至數十百言安其所
習終以自蔽如劉子駿所譏挾恐見破之私意而無從
善服義之公心其弊乃至今尙在也往時江君藩實爲
漢學師承記而文詞多蕪無條例可尋予爲倣漢史儒
林傳掇其大要著於篇 國朝言漢學者以大江南北
爲最顯要之言儀禮自濟陽張氏爾岐故崑山顧亭林

爲之語曰獨精三禮卓然經師吾不如張稷若言春秋
左傳自鄒平馬氏驥故顧氏一見其書歎曰必傳之作
也馬氏同時有掖縣王爾膺讀經宗漢學以爲易荀虞
亂於王輔嗣書馬鄭亡於僞孔氏春秋賈服滄於杜元
凱其幸存者詩毛氏鄭氏禮鄭氏公羊何氏耳窮經以
毛何鄭爲主庶乎可矣後百餘年而曲阜孔廣森撫約
治公羊春秋爲一代絕學焉撫約同時益都李南澗文
藻好博覽不爲世俗學德州梁鴻翥窮老治經月必誦
九經一過鄉里目爲癡人文藻爲之延譽遂知名於世
又有曲阜桂氏馥深精小學撰說文解字義證最後有

棲霞郝懿行撰爾雅義疏皆究心古訓以踵前儒之盛軌漢書云齊人好經術魯俗上禮義重廉恥雖去聖久遠其好學猶愈於他俗今並書於此以俟當世儒者論列焉

周易象解序

吾友王菊人明經以同里楊君所撰周易象解屬予爲序其撰述大指見於君所自序者詳矣古人書不兩序君獨安取於予言哉記予幼時嘗見一老儒說易專主象數心竊以爲新奇可喜旣乃知其本於明儒來氏因取來氏書讀之更進而求漢儒得近人所輯鄭荀虞諸

家易說亦嘗粗識其梗概最後讀 御纂周易折中於

漢儒宋儒皆酌取其平所謂道契義文心符周孔後之
說易者可以無異辭矣夫易說愈衍而愈繁古聖人因
卜筮以示教故於六十四卦大象皆曰君子以之今乃
穿鑿傅會拘拘焉以變互錯綜爲言是聖人教人以作
易而非教人用易也矣昔朱子嘗言易本爲卜筮而作
其言皆依象數以斷吉凶又謂上古之書莫尊於易易
是尊陽抑陰進君子而退小人明消息盈虛之理然則
離象以言易固不可而非深明乎消息盈虛之理則於
其象必不免穿鑿傅會固猶未能眞得聖人之本義也

子觀 四庫書目易類著錄至一百五十九部一千七百四十八卷而存目之書乃多至三百十七部二千三百七十一卷可謂繁矣楊君是書與明劉氏濂易象解取名偶同吾不知世有續成經籍考者將舉君此書與來氏集注並傳耶抑第與存目耶聞菊人言君於易象亦精研三十餘年予之荒廢此經久矣讀君是著輒興加年學易之思故述幼時所習以坳君撰述之末又竊有感於時事以爲尊陽抑陰進君子退小人乃古今之通義君旣深明易理異日願更因菊人就君質之君其以予言爲何如光緒戊戌春正月

古文周易跋

昔朱子守臨漳日有四經四子之刻四子卽今所謂四子書也四經則易書詩春秋而易用呂氏考定古文兼附音訓蓋欲使學者玩心全經涵泳白文而勿泥於象數訓詁其意善矣顧原本今不可見予嘗得一明刻本爲武昌朱廷立校刊其篇章分析如右今輒爲緝刻以貽學者又附刻音訓於後以符朱子之舊云按古周易十二篇見漢書藝文志顏師古注云上下經及十翼故十二篇班氏以爲宓戲氏始作八卦文王重易六爻作上下篇孔氏爲之彖象繫辭文言序卦之屬十篇又曰

孔子晚而學易讀之韋編三絕而爲之傳傳卽十翼也
故周易有經有傳其來舊矣先儒謂以彖象文言雜入
卦中自漢費直始漢末鄭康成之徒始合經傳爲一至
王輔嗣注易乃悉分彖傳象傳以附經故曰古經始亂
於費氏而卒大亂於王弼唐人爲周易作正義用王韓
注本而十二篇之易遂亡夫經遭秦火易以卜筮獨存
不幸更爲漢儒所亂致後世學者不獲見商瞿以來相
傳舊文有宋大儒始起而釐正之乃近日言經學者動
欲尊漢抑宋於宋儒所訂雖是而亦幾沒其考證之功
人心之陷蔽若此可勝歎哉明刻繫辭上傳移天一至

地十與天數五地數五二節於大衍章首雖本漢書律
麻志與音訓本同然非繫辭傳舊文次第今則仍從古
本非敢擅改經文也其他經傳正文悉依 內府仿宋
槧周易本義校正亦閒與新刻音訓不符如屯六二屯
如直如今仍作遄謙上六利用行師征國今本仍有邑
字與唐石經合此類頗多讀者當自能辨之

卜氏族譜後序

自譜牒之學廢而聖賢後裔有莫知其世次者矣予觀
歐陽文忠與曾子固論世族書以曾元之曾孫樂爲漢
都鄉侯又四世曰據避王莽亂始居豫章考之於史皆

不合因疑其久遠莫稽蓋未嘗不歎歐陽公之詳且愼也及觀湘鄉曾文正公自稱其家譜亦以據爲南遷之祖則知其沿誤所從來久矣濟南府學訓導卜君爲先賢卜子後裔一日奉其所爲族譜屬序於予予讀其譜中所序以漢御史大夫式爲七世祖自先賢而下則莫詳其事跡但記名字而已按漢書第言式爲河南人譜以爲先賢七世孫不知其於何所取徵大抵亦如曾氏之自有家譜爲世代所傳也其稱先賢爲衛人則本諸家語蓋今館陶縣西南七十里有西河寨河上村有卜夫子祠世儒或以爲先賢故里正禹河故道所經故有